

**Акафист**  
**иже во святых отцу нашему Иоанну,**  
**архиепископу Константина града,**  
**Златоусту**

*Память 27 (13) ноября, 12 февраля (30 января)*  
*(Собор вселенских учителей и святителей),*  
*27 (14) сентября (преставление)*  
*и 9 февраля (27 января) (перенесение мощей)*

***Кондак 1***

Возбранный вождю Церкви Христовы,  
златословесный учителю Иоанне! От юности  
добродетельми украсився, добре потрудился еси, и за  
Имя Христово гонение претерпев, во изгнании житие  
скончал еси: сего ради на небесех сугубо прославлен  
еси, мудрый чина Церковнаго устроителю. Темже и  
мы умиленно чтим тя зовуще:

Радуйся, святителю великий Иоанне Златоусте.

***Икос 1***

Ангельский образ нося, во плоти аки безплотен  
пожил еси, Иоанне: во спасение бо братий многия  
труды подъемля, дела добрыми Отца Небеснаго  
прославил еси. Темже ти глаголем:

Радуйся, Церкви Православныя украшение;  
радуйся, родителей именитых чадо благословенное.  
Радуйся, еще во отрочестве от матери твоея любовию  
ко слову Божию напоенный; радуйся, от юности  
разум игу Христову покоривый. Радуйся, Богови  
усердно послуживый; радуйся, вселенныя учителю.  
Радуйся, христиан всех времен в молитвах

наставниче; радуйся, жития иноческаго в Цареграде обновителю. Радуйся, готфов и скифов просветителю; радуйся, богоукрепленный правды ревнителю. Радуйся, вшедый в радость Господа твоего; радуйся, усердный о нас предстателю.

Радуйся, святителю великий Иоанне Златоусте.

### ***Кондак 2***

Видя Христос родителей твоих Секунда и Анфусы житие чистое, благоволи я прославити, и ты, Иоанне, има во утешение дарова; да вернии, добродетели твоя поминающе, превозносят чету праведную, ты израстившую, и, той ревнующе, поют Богови: Аллилуия.

### ***Икос 2***

Разум учением умудривый, сердцем же во благочестии от младости воспитан сый, радость и утешение был еси, Иоанне, матери твоей, егда супруга своего и дщере лишился. Темже приносим тебе хвалы сицевыя:

Радуйся, отроком звездо благодравия; радуйся, ангела хранителя увеселение. Радуйся, яко того николиже опечалил еси; радуйся, присных любимиче. Радуйся, во учении преспевавый и тем мудрецы мира сего удививый; радуйся, яко, еще ученик сый, Анфимия богохульника посрамил и вразумил еси. Радуйся, угнетенных слезы горькия в судех узревый; радуйся, от творящих беззакония уклонивыйся. Радуйся, пути незлобия спасительнаго взыскавый; радуйся, по успении матере в пустыню заключивыйся. Радуйся, тамо за родители

преставльшиися Богови усердно моливыйся; радуйся, яко тии днесь, со Владычицею и святыми ликующе, от земнородных величаются и хвалятся.

Радуйся, святителю великий Иоанне Златоусте.

### ***Кондак 3***

Силы, во еже словом и делом Христу работати стяжал еси, Иоанне, аки тезоименный ти Предтеча, в пустыни. Тамо бо, постом страсти плотския умертвив, молитвою дух окрилил еси и, яко воин, противу князя власти воздушныя во вся оружия Божия облеклся еси, со упованием поя Богу крепкому: Аллилуия.

### ***Икос 3***

Имея власяницу и пояс усмен о чреслах, Крестителя Христова ревнителю, былием питался еси, Иоанне, в пустыни, из неяже, яко муж силы исполнь, изшел еси. Темже вопием ти:

Радуйся, воздержанием Илии Пророку уподобивыйся; радуйся, нищеты Христовы подражателю. Радуйся, целомудрием неможение телесе укрепивый; радуйся, богомыслием уныние отгнавый. Радуйся, памятью всеведения Божия сердце непорочно соблюдый; радуйся, бдением козни бесовския посрамивый. Радуйся, искушения сам победивый и иныя последи томужде научивый; радуйся, в делании духовнем подвизающихся мудрый укрепителю. Радуйся, друга твоего Феодора от падения греховнаго удержавый; радуйся, друга твоего епископа Василия во служении утвердивый. Радуйся, от мира изгнанным пристанища тихаго указателю; радуйся, иноческаго жития защитниче.

Радуйся, святителю великий Иоанне Златоусте.

### ***Кондак 4***

Бурю искушений новую победил еси, Иоанне, в пещере един вселився; болезни же ради из пустыни изшед во Антиохию, от святого Мелетиа во диакона поставлен был еси и попечению о неимущих ревностно предался еси. Еже видяще, вернии радостно пояху Богови: Аллилуия.

### ***Икос 4***

Слышав от верных о тебе речи хвалебныя, святой Флавиан по достоянию благодать священства низведе на тя, Иоанне. Темже людие антхохийстии веселяхуся и, труды твоя праведно чтуще, тако тя величаху:

Радуйся, о себе попечение всякое отвергий; радуйся, убогим покрове. Радуйся, теплое сирым прибежище; радуйся, скорбей утолителю. Радуйся, о людских невежествиих печальниче; радуйся, девственного жития сладкогласный ублажателю. Радуйся, многи иудеи просветивый; радуйся, искавшия спасения правым учением оглашавый. Радуйся, житием твоим сего учения не посрамивый; радуйся, благочестия светильниче. Радуйся, Апостолом единоправниче; радуйся, яко праведно дадеся ти жребий пастырского о душах попечения.

Радуйся, святителю великий Иоанне Златоусте.

### ***Кондак 5***

Боготочною кровию от вечныя смерти искупленныя соблюдая, егда сан священства приял еси, Иоанне,

дело благовестника трезвися добре сотворил еси, обличая, запрещаая, умоляя со всяким долготерпением и учением и поя Богу: Аллилуия.

### ***Икос 5***

Видя нестроения во граде, скорбя же о сем, покоя не познал еси, Иоанне, неверныя бо благовестием оглашал еси, верныя же таинства церковными освящая и тайнам веры уча, достойно стяжал еси имя Златая уста, слышав от всех сицевая:

Радуйся, пастырю добрый; радуйся, святым крещением многа чада Церкви Христове породивый. Радуйся, помазанием мира печать дара Духа Святаго тем даровавый; радуйся, святейшия трапезы предстоятелю умиленный. Радуйся, пищею нетления чада твоя питаый; радуйся, покаянием сердец очистителю. Радуйся, супружеств о Господе сочетателю; радуйся, елеа помазанием целителю. Радуйся, слова Божия неложный истолкователю; радуйся, ересей мощный обличителю. Радуйся, глубокий кладязю истиннаго богословия; радуйся, яко притяжал еси паствы сердца, любви к тебе исполненная.

Радуйся, святителю великий Иоанне Златоусте.

### ***Кондак 6***

Проповедник покаяния наипаче явился еси, Иоанне, егда людие антиохийстии, царя подобие низвергше, гневу того достойно подпадоша. Божиим бо милосердием утешая, ко исправлению жития словесы твоими влекл еси вся, во еже сердцем чистым пети Богу: Аллилуия.

## ***Икос 6***

Возсия Антиохия радостью, егда по словеси твоему беззакония своя оплакавши, цареву прощение получи. Обаче скорбию омрачися вскоре, с тобою разлучаема: во архиепископа бо Царюграду призван был еси, Иоанне. Темже тебе вопием:

Радуйся, аки Исаиа, скорбьми града отеческого поболевый; радуйся, аки Иеремиа, злонравие людское оплакавый. Радуйся, аки Иезекииль, беззаконники ко обращению призывавый; радуйся, молние, гордыню низложившая. Радуйся, гrome, беззаконно жившия устрашивый; радуйся, корыстолюбия обличителю. Радуйся, пагубу тщеславия показавый; радуйся, студнаго еллинскаго многобожия посрамителю. Радуйся, смятенных сердец умирителю; радуйся, споспешниче епископу Флавиану, старцу праведному. Радуйся, со пустынножители царския приставники на милость преклонивый; радуйся, Ионе, Ниневию спасшему, равный.

Радуйся, святителю великий Иоанне Златоусте.

## ***Кондак 7***

Хотя церковь Цареградскую, аки невесту Христову, достойно украсить, во благолепие вся привел еси, Иоанне. Всенощными бо бдении от сборищ арианских верныя отвратил еси и чин Божественныя литургии мудре устроил еси яко благовонное миро, источив молитвы, имиже назидаящися, о тебе Богови поем: Аллилуия.

## *Икос 7*

Новое знамение милости Божия бысть о тебе, святителю: молитвами бо твоими вернии всех времен, Богови беседующе, во спасение умудряются. Приими убо от нас сицевыя хвалы:

Радуйся, аки Давид, словесы молитвенными Церковь Божию обогативый; радуйся, аки брат Божий Иаков, чин Божественных литургии написавый. Радуйся, в томже Великому Василию подражавый; радуйся, Духа Святаго приятелище. Радуйся, тобою бо Дух Святой написа словеса спасительная; радуйся, яко молитвами твоими, от сна воставше, Отца благодарим. Радуйся, яко твоими словесы, ко сну грядуще, от Духа Святаго прегрешений оставления просим; радуйся, яко усты твоими Сына Божия умоляем, да не в суд причастие Божественных Таин приемем. Радуйся, рабе Божий, уничиженный на вечерю Христову глашай; радуйся, проповедниче Распятаго на кресте за мирский живот и спасение. Радуйся, яко в слово твое, аки в ризы позлащены, тайны веры одеяшася; радуйся, песнотворче и вития дивный.

Радуйся, святителю великий Иоанне Златоусте.

## *Кондак 8*

Странник во юдоли земней быв, смирения, воздержания и чистоты образ показал еси, Иоанне, житием во царствующем граде: тамо бо обители иноческия обновил и создал еси, и уставы жития монашескаго дал еси девам непорочным; от нихже, аки фимиам благовонный, вознесся Богови песнь

великая: Аллилуия.

### ***Икос 8***

Всею душею Христови работая, человеком угождати не восхотел еси, Иоанне. Именитым бо вечера устроить престав, убогим трапезы умножил еси, странноприимницы же и безмездныя врачевницы недужным создав, научил еси пети тебе:

Радуйся, Николая, святителя Мирликийскаго, соревнователю; радуйся, стяжавый смирением высокая. Радуйся, приобретеный нищетою богатая; радуйся, сими добродетельми иноком образ бывый. Радуйся, гладных питателю; радуйся, аки Авраам, странныя приимавый. Радуйся, безприютных сирот приятелище; радуйся, беспомощных старцев и стариц попечителю. Радуйся, избытки своя неимушим расточивый; радуйся, яко коемуждо в горестех, аки ангел утешитель, являлся еси. Радуйся, руки богатых на благодеяния отверзавый; радуйся, яко о глубине милосердия твоего Мати Божия возрадовася.

Радуйся, святителю великий Иоанне Златоусте.

### ***Кондак 9***

Всяк язык спасти хотя, проповедники Евангелия ко скифом, праотцем нашим, послал еси Иоанне, из Константина града, в немже храм во имя Апостола Павла создал еси готфом, да и тии, ересь ариеву отвергше, православными усты поют Богови: Аллилуия.

### ***Икос 9***

Витии православия к неверным послав, к церквам



верных, во Азии сущим, сам подвиглся еси, Иоанне, и тыя посещая, нерадивыя обличая, усердныя же похваляя, вся смотрительне устроил еси. Темже ты славим:

Радуйся, православия светило; радуйся, пастырю добрый, о заблуждших овцах попекийся. Радуйся, яко в земли скифстей днесь имя твое прославляется; радуйся, яко во имя твое церкви Божия zde воздвизаются. Радуйся, служения апостольскаго причастниче; радуйся, по словеси Апостола Петра стадо Божие пасый. Радуйся, не нуждею, но волею и по Бозе сие посещавый; радуйся, мздоимства твердый искоренителю. Радуйся, правил церковных нелицеприятный блюстителю; радуйся, ленивыя рабы праведно изгнавый. Радуйся, яко во благое трудившиися от тебе похвалишася и укрепишася; радуйся, Церкви испытанный управителю.

Радуйся, святителю великий Иоанне Златоусте.

### ***Кондак 10***

Спасению паствы твоея служити не престал еси Иоанне, от Азии в Царьград возвратився. Егда же царицы и именитых злонравное житие обличати безбоязненно начал еси, скорби многи приял еси; тобою бо обличаемии, не могуще абие яве заградити праведная уста твоя, тайно ковы деяху, во еже погубити ты, чисте Богови взывающа: Аллилуия.

### ***Икос 10***

Стена невинно гонимым иноком явился еси, Иоанне: сего ради яве обнажися злоба велия, юже врази на ты имеяху. Льстивый бо Феофил со царицею

нечестиво на соборищи оболга и низложи тя, не помянув трудов твоих во благо отечествия. Мы же сия благодарне воспоминаем, глаголюще:

Радуйся, дивную любовь ко отечеству земному показавый; радуйся, Царяграда от варварского нашествия свободителю. Радуйся, Гаины, грозного вождя готфскаго, укротителю; радуйся, милостей древних, церкви царьми дарованных, охранителю. Радуйся, Евтропию властному убежище церковное отъяти не попускавый; радуйся, последи в сем убежищи тогожде Евтропия гонима спасый. Радуйся, ограждения ради Нитрийских иноков неправды соборища беззаконнаго кротце претерпевый; радуйся, яко слово Писания: «Любы долготерпит», на тебе оправдася. Радуйся, ополчатися за тя присным воспретивый; радуйся, меча противу врагов неподъемый. Радуйся, влаstem повинувыйся и сего ради волею в руки воинов нощию предавыйся; радуйся, из отечествия правды ради изгнанный.

Радуйся, святителю великий Иоанне Златоусте.

### ***Кондак 11***

Пением радостным изменися вскоре плачь паствы твоя, доблий страдальче: во изгнание бо влекому ти, внезапно гром возгреме, молния возблиста и, ветром шумящим, земля поколебася. Яже видящи и трепещущи, царица раскаяся и честне тя возврати, смиренно вопиющи Богу: Аллилуия.

### ***Икос 11***

Светлую православия свещу, сугубо царица возненавиде тя вскоре, егда обличил еси ю, подобие

свое близ храма поставльшую: сего ради, сторицею осужденный, в Кукузе, веси дальней и малей, заточен был еси, Иоанне. Приими убо от нас сицевыя хвалы:

Радуйся, по словеси Иеремиину от юности ярем Божий подъемый; радуйся, по глаголу Христову, руку делания на рало духовное возложивый. Радуйся, до конца вспять не отвративыйся; радуйся, противу царицы злонравныя возгремевый. Радуйся, тою, аки Креститель Иродиадою, возненавиденный; радуйся, от убийц незримо ангелом спасенный. Радуйся, в дому твоем любовью паствы твоея хранимый; радуйся, клеветами неправедных судей уничиженный. Радуйся, в заточение со смирением безропотно шедый; радуйся, верными оплаканный. Радуйся, за Господа распятого изъязвленный и заушенный; радуйся, яко мученицы со Предтечею на небесех о терпении твоем ликоваху.

Радуйся, святителю великий Иоанне Златоусте.

### ***Кондак 12***

Благодать Божия и во изгнании соблюдаше тя, Иоанне, тамо бо, аки Павел святой во узах, финикияном и персом Евангелие возвещал еси, посланьми верныя утешая. И тако упасл еси Церковь даже до дне, воньже золотая уста твоя изрекоша словеса последняя: слава Богу за вся! Душа же твоя на небеса пренесена бысть святыми ангелы, победне вопиющими: Аллилуия.

### ***Икос 12***

Поюще радостно, вернии пренесоша святыя мощи твоя, Иоанне, в Царьград, отнюдуже слава твоя

пройде до последних земли и обыде всю вселенную, учаши всех пети тебе сице:

Радуйся, странниче, во отечестве небесное вшедый; радуйся, всех церквей молитвами напутствованный. Радуйся, на пути в Пифиунт дальний в Команех течение скончавый; радуйся, яко кончину ти предрече священномученик Василиск. Радуйся, от сего услышавый: «Брате, завтра купно обрящемся»; радуйся, Святых Тайн приятием к восхождению в рай укрепивыйся. Радуйся, яко душа твоя от многотруднаго телесе тихо разлучися; радуйся, яко тление не прикоснуса костем твоим. Радуйся, яко на сих во храмах жертва безкровная днесь возносится; радуйся, небесных высот обитателю, светом невечерним осиянный. Радуйся, яко со святыми Василием Великим и Григорием Богословом явлься, восхваляти тя купно со оными вся научил еси; радуйся, славо Церкви вселенския.

Радуйся, святителю великий Иоанне Златоусте.

### ***Кондак 13***

О святителю великий Иоанне Златоусте! Призри с небесных высот на ны, долу поверженныя, и прием сие от любве нашея приносимое ти хваление, умоли Господа Бога, да излиет на ны благодать Свою, немощная врачующую, сущия во православии укрепит, отпадшия же от Церкви паки в лоно тоя приведет, благоутробием Своим оскудевающая восполняя, и всех сподобит с тобою и всеми святыми пети Ему во веки: Аллилуия, Аллилуия, Аллилуия.

*(Этот кондак читается трижды, затем икос 1 и кондак 1)*

## *Икос 1*

Ангельский образ нося, во плоти аки безплотен  
пожил еси, Иоанне: во спасение бо братий многия  
труды подъемля, дела добрыми Отца Небеснаго  
прославил еси. Темже ти глаголем:

Радуйся, Церкви Православныя украшение;  
радуйся, родителей именитых чадо благословенное.  
Радуйся, еще во отрочестве от матери твоея любовью  
ко слову Божию напоенный; радуйся, от юности  
разум игу Христову покоривый. Радуйся, Богови  
усердно послуживый; радуйся, вселенныя учителю.  
Радуйся, христиан всех времен в молитвах  
наставниче; радуйся, жития иноческаго в Цареграде  
обновителю. Радуйся, готфов и скифов просветителю;  
радуйся, богоукрепленный правды ревнителю.  
Радуйся, вшедый в радость Господа твоего; радуйся,  
усердный о нас предстателю.

Радуйся, святителю великий Иоанне Златоусте.

## *Кондак 1*

Возбранный вождю Церкви Христовы,  
златословесный учителю Иоанне! От юности  
добродетельми украсився, добре потрудился еси, и за  
Имя Христово гонение претерпев, во изгнании житие  
скончал еси: сего ради на небесех сугубо прославлен  
еси, мудрый чина Церковнаго устроителю. Темже и  
мы умиленно чтим тя зовуще:

Радуйся, святителю великий Иоанне Златоусте.

## *Молитва*

О святителю великий Иоанне Златоусте! Многая и  
различная дарования от Господа приял еси и, яко раб

благий и верный, вся данная тебе таланты добре умножил еси: сего ради воистину вселенский учитель был еси, яко всяк возраст и всяко звание от тебе поучается. Ты еси отроком – послушания образ, юным – целомудрия светило, мужем – трудолюбия наставник, старым – незлобия учитель, иноком – воздержания правило, молящимся – вождь от Бога вдохновенный, мудрости ищущим – ума просветитель, витиям доброглаголивым – слова живаго источник неисчерпаемый, благотворящим – милосердия звезда, начальствующим – правления мудраго образ, правды ревнителем – дерзновения вдохновитель, правды ради гонимым – терпения наставник: всем вся был еси, да всяко некия спасеши. Над всеми же сими стяжал еси любовь, яже есть союз совершенства, и тою, яко силою Божественною, вся дарования во едином лице твоём во едино совокупил еси, и туюжде любовь, разделенная примиряющую, в толковании словес апостольских всем верным проповедал еси. Мы же грешнии, по единому кийждо свое дарование имуще, единения духа в союзе мира не имамы, бываем тщеславни, друг друга раздражающе, друг другу завидяще: сего ради дарования наша разделенная не в мир и спасение, но во вражду и осуждение нам являются. Темже к тебе, святителю Божий, припадаем, раздором обуреваемы, и в сокрушении сердца просим: молитвами твоими, отжени от сердец наших всяку гордость и зависть, нас разделяющия, да во мнозех удех едино тело церковное будет, да по словеси твоему молитвенному возлюбим друг друга и единомыслием исповемы Отца

и Сына и Святаго Духа, Троицу Единосущную и  
Нераздельную, ныне и присно и во веки веков.  
Аминь.